

Njuolggadusat movt stipeanddaid meannudit, evttoheapmi ja juohkit

1. Ulbmiljoavku

Sámi Dáiddáriid ja Girječálliid Buhtadusfoandda (SDGB) stipeanddaid sáhtta juohkit dáiddáriidda geat eanas áiggi orrot ja doibmet Norggas. Go orru heivvolaš, de sáhtta spiehkastit dan gáibádusas ahte galgá orrut ja doaimmat Norggas. Stipeanddat eai guoskka dáiddáriidda vuoddoahpahusdásis.

2. Juohkimii eavttut

Stipeanddaid juohkimis galgá deattuhit dušše dáiddalaš doaimmaid ja kvalitehta.

Ii galgga geahččat ohcci sohkabeallái, dáiddaservviid miellahttovuhtii, dahje oskkolaš ja politihkalaš oaiviliidda. Ahki galgá/sáhtta geavahuvvot eaktun dušše daid oktavuođain gos lea daddjon ahte ahki galgá/sáhtta leat juohkima árvvoštallamii eaktun.

Dábálaččat ii sáhte seamma dáiddár oažžut eanet go ovttá stipeandda seamma jagi. Liikká sáhttet sii geat leat ožžon Stáhta Dáhkádusdietnasa, stáhta bargostipeandda, Sámedikki bargostipeandda ja stáhta/Sámedikki bargostipeandda nuorra/aittoálggahalli dáiddáriidda oažžut mátkedahje oahppostipeandda, ávnasstipeandda ja čájáhusstipeandda. Sii geat leat ožžon nuorra/aittoálggahalli dáiddáriid bargostipeandda sáhttet maid oažžut álggahanstipeandda.

3. Almmuheapmi, ohcanáigi

Stipeanddat almmuhuvvojit Norsk Lysingsbládis ja almmuhussan beaiveaviissain. Dasa lassin čállojuvvo SDS ja SGS miellahtuide diehtu stipeanddaid almmuheami birra.

Ohcanáigi lea golggoimánu 27. beaivvi

Ohcamušat mat leat poastasteampilastojuvvon dahje maid buktet maŋŋá ohcanáigemeari, eai meannuduvvo ja mahcuhuvvojit ohccái.

4. Gáibádus ohcamuša sidollui ja hápmái

Ohcamuša galgá čállit dihto ohcanskovvá. Ohcamuša galgá vuolláičállit ja dan galgá deavdit dievaslaččat buriiguin ákkastallamiiguin.

5. Áššemeannudeapmi, evttoheapmi ja juohkin

Foandastivra juohká stipeanddaid áššedovdi lávdegottiid evttohusaid vuodul, maid Sámi Dáiddačehpiid Searvi (SDS) ja Sámi Girječálliid Searvi (SGS) leat nammadan.

Foandastivrra čállingoddi vuostáiváldá ja registrere ohcamušaid, ráhkkanahttá áššiid Foandastivrra čoahkkimiidda ja bidjá doibmii Foandastivrra mearrádusaid. Bargu galgá doaimmahuvvot daid mearrádusaid mielde hálddašanlágas mat gusket áššemeannudeapmái, nugo bealalašvuolta (habilitehta), jávohisgeatnegasvuolta ja neavvungeatnegasvuolta.

5.1 Foandastivra

Foandastivrras leat njeallje miellahtu. Guoktása sis nammada SDS jahkečoahkkin ja guoktása fas SGS jahkečoahkkin. Jahkečoahkkimat vállejit maid Foandastivrii várrelahtuid.

Foandastivrra miellahtut ja várrelahtut nammaduvvojit guovtti jahkái ain hávális. Ii oktage miellahttu sáhte leat Foandastivrras lahtun eanet go guhtta maŋŋálaga jagi.

Mearridanváldi lea go golmmas njealji miellahtus lea čoahkkimis, ja sin searvvis galgá leat jodiheaddji ja/dahje sadjásaš jodiheaddji.

Jodiheaddjis lea duppaljietna jus jienat juohkásit jámma, ja jus jodiheaddji ii leat čoahkkimis, de lea sadjásaš jodiheaddjis duppaljietna.

Foandastivrra miellahtut ja várrelahtut eai sáhte ieža oheat SDGB stipeanddaid dan áigodagas masa leat vállejuvvon.

Foandastivra galgá neavvut fágálávdegottiid čuovvut dohkálaš áššemeannudan prinsihpaid ja nu guhkás go vejolaš bearráigeahččat ahte dát prinsihpat čuvvojuvvojit. Foandastivra galgá ráhkadit čilgejeaddji njuolggadusaid fágálávdegottiid bargguide.

Foandastivra juohká stipeanddaid áššedovdi fágálávdegottiid evttohusaid vuodul. Foandastivra galgá bearráigeahččat ahte láhkageavaheapmi ja áššemeannudeapmi lea riektá. Ohccit geat eai oaččo stipeandda, galget oažžut standárdavástádusa.

Foandastivra čállá beavdegirjji iežas čoahkkimiin. Beavdegirjgis galgá bohtit ovdan

- a) goas čoahkkimat leat lágiduvvon
- á) geat čoahkkimis ledje mielde
- b) bealalašvuhta
- c) makkár evttohusaid leat meannudan
- č) meannudeami boadus
- d) ja makkár eará áššit leat meannuduvvon

Kopijja beavdegirjji sáddejuvvo Kulturdepartementii, SDS ja SGS stivrraide oktan čállošii mas oaidná movt stipeanddat leat juogaduvvon.

5.2 Áššedovdi fágálávdegottit

5.2.1 Oppalaččat

SDS ja SGS fágálávdegottit leat Foandastivrra fágalaš áššedovdi orgánat. Fágálávdegottit buktet evttohusaid stipeandajuohkimiidda, ja buktet cealkámuša Foandastivrii jus juogaduvvon stipeanddat geavahuvvojit earaláhkái ja buktet maid cealkámuša Foandastivrii váiddaáššiiin.

SDS ja SGS jahkečoahkkimat välljejit fágálávdegottiid dan áigodahkii mii goappáge dieid servviid njuolggadusain lea mearriduvvon. Fágálávdegottiin galget leat unnimusat golbma miellahtu, vejolaččat maidái várrelahtut. Fágálávdegottiid áirasiid ovttasteapmi čuovvu njuolggadusaid maid servviid jahkečoahkkimat leat dohkkehan. Fágálávdegottiin lea mearridanváldi go unnimustá golmmas miellahtuin dahje sin sadjásaččat leat čoahkkimis. Várrelahtuin lea jienastanvuogatvuhta dušše de go sii leat fásta lahtu sajis čoahkkimis.

5.2.2 Eavttut maid vuodul evttohusaid nammada

Fágálávdegottit galget evttohit ohcciid iežas árvoštallama vuodul man vuodđun lea dáiddalaš kvalitehta ja barggut. Árvoštallan galgá leat guoskivaš njuolggadusaid mielde.

5.2.3 Áššemeannudeapmi

Ohcamušat mat fágálávdegottiid mielas eai gula sin fágasuorgái, galget dakkaviđe mahcahuvvot Foandastivrra čállingoddái.

Fágálávdegottit doaimmahit čálalaš evttohemiid Foandastivrii. Sii galget vuoruhit golbma ohcci maŋŋálaga. Juohke olbmui galgá čállojuvvot oanehaš ákkastallan, mas deattuha daid ákkaid mat lávdegotti mielas leat mearrideaddjin.

Fágálávdegottit čállet beavdegirjji iežaset čoahkkimiin. Beavdegirjgis galgá bohtit ovdan

- b) goas čoahkkimat leat lágiduvvon
- á) geat čoahkkimiin ledje mielde
- b) bealalašvuhta
- c) galle ohcamuša leat ožžon ja galle leat meannudan
- č) movt ohccit vuoruhuvvojit, das galget leat mielde gitta golbma sadjásaš evttohusa
- d) galle ohcamuša leat hilgon, ja čilgehus manne leat daid hilgon

Kopijja beavdegirjgis sáddejuvvo Foandastivrii oktan evttohusaiguin.

Fágálávdegottiid evttohusat galget meannuduvvot čiegus áššiiin gitta dassáži Foandastivra lea dahkan loahpalaš mearrádusa stipeandajuohkimis, ja dat mearrádus lea almmuhuvvon.

Fágálávdegottiid evttohuvvon sadjásaš kandidáhtat eai galgga almmuhuvvot.

6. Váidinvejolašvuohta

Foandastivrra mearrádusaid sáhtta váidit. Váidda čállojuvvo Kulturdepartementii, ja sáddejuvvot Foandastivrii. Dáiddalaš árvvoštallama ii sáhte váidit, gč. Gonagaslaš cealkámuša 20. beaivvi skábmamánus 1987 nr. 924.

Foandastivra meannuda váidaga, ja sáhtta nuppástuhttit iežas mearrádusa. Jus Foandastivra doalaha iežas álgomearrádusa, de sádde Foandastivrra ávžžuhusa Kulturdepartementii.

Ohccit geaid ohcamušat hilgojuvvojit, sáhttet hilgunmearrádusa váidit, gč. hálddahuslága § 2, goalmát lađđasa ja hálddahuslága kap. VI.

7. Raportagáibádus ja čuovvoleapmi

Olbmot geat ožžot stipeandda galget sáddet raportta stipeandageavaheami birra Foandastivrii. Raporta galgá čállojuvvot dihto skovvá. Foandastivrra čállingoddi goziha ahte raporttat leat dievaslaččat ja govttolaččat, mii mearkkaša ahte galgá geahččat lea go raportaskovvi devdojuvvon ja vuolláičállojuvvon. Čállingoddi galgá maid geahččat raporttaid ja árvvoštallat lea go stipeanda geavahuvvon juohkineavttuid mielde. Čállingotti iskama vuodđun leat dat dieđut maid son gii lea ožžon stipeandda lea deavdán skovvá.

8. Váikkuhusat jus addá boasttu dieđuid dahje jus ii deavdde eavttuid

Jus ii doala raporterengeatnegasvuoda, dahje jus sii geat stipeanddaid lea ožžon eai sádde raportta, de sáhtta Foandastivra mearridit ahte sidjiide ii juolluduvvo ođđa stipeanda.

Jus stipeandaoažžu dieđut eai doala deaivása dahje jus son rihkku eavttuid maid vuodul lea ožžon stipeandda, de sáhtta gáibiduvvot ahte son máksá oasi dahje olles stipeandda ruovttoluotta.

Stuoradikki juolludannjuolggadusaid § 17 mielde sáhtta departemeanta ja/dahje Riikkarevišuvdna čadahit iskama mas geahččá leat go stáhtadoarjagat mat juolluduvvojit doarjjan dahje juolludeapmin almmolaš dahje priváhta doaimmaide geavahuvvon eavttuid mielde.

9. Stipeandageavaheami mañideapmi/nuppástuhttin

Sii geat stipeanddaid leat ožžon, sáhttet earenoamáš dilis ohcat mañidit stipeandageavaheami dahje ohcat beassat nuppástuhttit dan. Ohcamuš sáddejuvvo Foandastivrii.